

四庫全書

集部

欽定四庫全書

集部
明詩綜卷四十九

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官庶吉士臣潘曾起

謄錄監生臣楊恪

欽定四庫全書

明詩綜卷四十九

翰林院檢討朱彝尊撰

徐學謨 一首

學謨初名學詩字子言更字叔明蘇州嘉定人
嘉靖庚戌進士授禮部主事歷郎中出知荊州
府遷副使擢僉都御史撫鄖陽召拜禮部尚書
加太子少保有海隅春明二稿

靜志居詩話宗伯本名學詩以與劾分宜者同
姓名遂更為謨昔杜欽損目人斥為盲鄙惡其
同字遽自稱疾猶見詆於當時若宗伯更名乃
屬患失百世而下知有直臣陳孟公之名蓮何
必驚坐諱哉宗伯雅負詩
名然多懦響殆肖其人

白螺行

風吹巫峽江水大何者一螺當江坐勢壓水口抵齧崩
沙脊嶙峋橫伏馱螺邊人家泛估船得魚買鹽撐日過
去年水淹車水堤滿縣漂衝失耕作官府有差無處派
翻視白螺為奇貨紛紛下帖迎上司白日索夫夜巡邏

可憐殘子苦無皮忽聞使者收門課門既有差地有租
此額更從何處科生血迸地不得收爺娘妻子忍遷播
輸錢猶可輸命難偏側乾坤幾穩卧魯門爰居知避災
眼前世事堪一唾老蛟跋浪白鱸泣賤夫只恐滄江破

劉效祖

四首

效祖字仲修濱州人嘉靖庚戌進士除衛輝推
官徵授戶部主事歷員外郎中出為陝西按察

副使有雲林豪

朱仲立云仲修詩沉著渾雄
得盛唐氣格李伯承之亞也

詩話昭陵嘗遣中使索其題冊呼曰念菴念菴副使別字也因賦詩云更生雙鬢已蕭騷敢謂文章擅彩毫過誤偶承明主問因緣不是鬱輪袍人傳其事以為列朝所未有詩亦爽豁惜集不傳

甕山耶律丞相祠作

迢遞荒山下披榛拜古祠衣冠猶昔日歲月已明時溪
遠泉聲細林深日影遲黃沙空朔漠誰與問荒碑

燕京歌

元會初分庭燎光君王親御紫霞觴不知五夜春多少
白日猶聞蠟炬香

塞上曲

龍沙近接古檀州多少從軍倚戍樓
寒夜不堪愁絕處西山片月挂城頭

九日獨酌

南山遙對菊花開欲采無人為舉杯
縱說柴桑貧謝客何曾不許白衣來

張四知一首

四知字子畏汝陽人嘉靖庚戌進士除刑部主

事轉兵部郎中出為四川按察僉事有韶亭集
上已送陳子韶赴浙東僉憲

暮春燕地草萋萋冠蓋追隨漢苑西
尊酒不須臨水泛
宮鶯已聽隔花啼風流遠媿山陰客
麗藻新傳上已題
況是河梁明日別離裾莫惜暫相攜

陳宗虞 一首

宗虞字子韶閬中人嘉靖庚戌進士歷官按察

副使有卧雲樓橐六亭集

穆敬甫云陳君詩過於激烈

送胡生南歸

揚子江風落暮潮
瓜洲夜月起蘭橈
西湖歸去三千里
家在芙蓉第一橋

翁夢鯉一首

夢鯉字希登莆田人嘉靖庚戌進士有雨川集

次忻州

故園杳無際
淒然客思多
雪中歸代郡
冰上度滹沱
野戍孤煙出
寒空一鳥過
邊庭誰與晤
獨賦式微歌

陳柏 一首

柏字子堅沔陽州人嘉靖庚戌進士歷官按察副使有蘇山集

送正卿弟之黎平

匹馬迢迢渡五溪雙旌遙指夜郎西莫憎遠道猶千里
隨處花開更鳥啼

田汝麟 二首

汝麟涿州人嘉靖庚戌進士

燕銜泥

燕銜泥巢君屋不食君家米與鹽但借君家梁上宿胡
為閉門相棄逐

遊空同山歌

空同山乃在涇水之南太白西危峰峭壁與天齊上有
栖霞千尺之幽洞下有迴流萬折之深谿煙岑古木渺
無際虎豹鼯鼯白晝啼憶昔軒轅帝問道廣成子煮銅
荆山下鍊藥鼎湖裏道成騎龍飛上天空留玄鶴巢雲

煙玄鶴招之不可得
翩翩四萬八千年
我來空同尋仙跡
欲索玄珠遊無極
塵海茫茫何處求
山寒日夕天空碧

方弘靜一首

弘靜字定之歙縣人嘉靖庚戌進士累官南京

戶部右侍郎

王仲房云定之祖法盛唐而於王孟尤近若流水不知處幽禽相與

飛不知春色減忽見林花飛永日空山寂幽然時一吟宛然二君遺響也

東巖

巖端曙日輝巖下啟松扉流水不知處幽禽相與飛青
山長對席白髮久忘機試與西鄰叟攜壺上翠微

藥尚約

一首

尚約字孔源膠州人嘉靖庚戌進士由溧水知
縣選授江西道御史謫安州判官遷懷慶推官

被論削籍

詩話孔源宮詞不
失溫柔敦厚之教

宮詞

玉簫吹斷落花香空結流蘇五鳳皇不遣和戎即恩幸
敢矜顏色過昭陽

馮臯謨 一首

臯謨字明卿海鹽人嘉靖庚戌進士由刑部郎
中出為江西按察僉事歷廣東參議副使福建
左參政有豐陽集

泊駕鵞湖遲友不至

野客饒春興輕舟坐夕曛湖光天下上暮色水氤氲成

鼓連城動漁歌隔岸聞參差吹未已獨立望夫君

潘季馴一首

季馴字時良號印川烏程人嘉靖庚戌進士除
九江推官擢江西道御史陞大理寺丞歷少卿
以僉都御史治河累官南京兵部尚書罷歸起
刑部尚書加太子少保總理河道有留餘堂集

詩話印川自嘉靖乙丑受命治河至萬曆庚辰
工成著有宸斷大工錄先後四總河務晚輯河
防一覽其大指謂通漕於河則治河即以治漕
會河於淮則治淮即以治河合河淮而同入於

海則治河淮即以治海立意在築隄束水借水
刷沙以此奏功百年以來俱守其規畫可謂能
捍大患者獨怪天啟初補謚列朝名
臣而公獨不與焉錄其詩為之嘆息

除夕

行到海窮處仍驚歲盡時
燈前誰共影愁裏強吟詩
游子歸何日芳春坐可期
滿城簫鼓動客思已淒其

梁夢龍一首

夢龍字乾吉真定人嘉靖癸丑進士改庶吉士
累官吏部尚書加太子太保贈少保謚貞敏

宿三川驛

寂寞三川驛風塵苦見侵
王程方未已客夜且高吟
山火延危嶺泉聲聒遠林
幽懷良不淺何日慰招尋

曹梅一首

梅字子和鹽山人嘉靖癸丑進士官郎中

沅州道中

亂山盤錯入沅州
瘴雨蠻烟動客愁
回首燕南家萬里
斜陽誰倚故園樓

孫應鰲一首

應鰲字山甫貴州清平衛人嘉靖癸丑進士歷
官南京工部尚書贈太子太保謚文恭有學孔
堂豪

華山雜咏

玉女窗開眼倍明仙童肅隊奏鸞笙
海雲初散蓬萊股
人在蒼龍背上行

王一鶚一首

一鶚字子薦曲周人嘉靖癸丑進士歷官太子少保兵部尚書有春陵集

三月晦日

花外東風送馬蹄平原一望草萋萋黃鸝苦欲留春住
深樹斜陽到處啼

張 翀 三首

翀字子儀柳州衛人嘉靖癸丑進士歷官兵部右侍郎天啟初追贈尚書謚忠簡有鶴樓集

別貴竹諸友

十年與君遊千里與君別把袂意不言含杯氣欲絕漸
隔瀟湘雲空留夜郎月一曲瑤琴彈知音對誰說

登焦山夜歸

短棹乘風去輕輿帶月歸花香入徑細漁火隔江微遠
寺猶聞磬荒村半掩扉石橋橫渡處醉看海雲飛

有懷

五落龍山葉三來雁足書夢中親舍近天外故人疎寥

潤乾坤裏疎狂醒醉餘秋風吹短髮溪畔獨躊躇

龐尚鵬一首

尚鵬字少南南海人嘉靖癸丑進士除平樂知縣入為監察御史歷官右副都御史巡撫福建天啟初追謚忠敏有百可亭摘藁

詩話少南視醴兩浙總理兩淮長蘆鹽屯身處脂膏不能自潤集中虛室行去細視餅中久無粟舉火終朝待鄰曲長饑近午始一餐敢望豐年收萬斛自注三月中旬已貸粟矣即此亦是得難

秋日園居

物候隨時變，那堪問歲華。
晚風三徑竹，朝雨半籬花。
自比禪居靜，從教物論譁。
浮生何所有，醉處便為家。

吳時來一首

時來字惟修，仙居人。
嘉靖癸丑進士，歷官右都御史、掌院事。卒，謚忠恪。
有《梧齋集》。

焦山夜歸

古寺探幽去，山城倚醉歸。
留人林月上，醒酒暑風微。
漁

唱搖江渡村燈照夕扉獨憐沙上鳥已宿尚驚飛

楊綵一首

綵字質夫虎賁右衛人嘉靖癸丑進士歷官右
僉都御史巡撫山西

雁門述懷

昔稱雁門郡嵯峨抱萬山樓煩隱天際滹沱水潺湲寒
沙慘白日北風摧朱顏封侯詎非願王事顧多艱丈夫
志四方茲游何時還

李 蒙 六首

蒙字于田內鄉人嘉靖癸丑進士選庶吉士除
檢討遷南京禮部郎中歷官提學副使有太史

集

詩話于田博洽中州人以擬楊用修而歸田之
後縱情聲伎放誕不羈女優登場至雜伶人中
持板按拍主人知而延之上坐恬然不為怪及
去借主人檐上馬挾女優連騎而去此其狂態
更甚于用修矣詩亦少
深忌絕句頗強人意

懷姚敘卿謫居

自從東郡別君侯
吳楚茫茫悵遠遊
故國鶯花牽客夢
大江風雨動人愁
偶緣散吏調琴鶴
無復題詩上酒樓
驛騎蕭條山海隔
逐臣心事兩悠悠

嘉靖宮詞

四首

沉水龍涎徹夜焚
桂宮芝館結祥雲
壇前纔布諸天位
苑外先催學士文

玉貌終年侍禁闈
每逢時節賜金緋
君王不愛纖腰舞
裁作雷壇拜斗衣

小車飛曳向玄都
翠羽金翹笑自扶
玉螭樹邊長日市
內璫爭買大秦珠

泥金檢玉祝長生
萬國封章止進呈
月滿西宮更漏永
九重風落步虛聲

都城雜詠

西宮白日靜波流
小殿玲瓏夾御溝
花樹重重春爛漫
遊人偷上洗妝樓

徐師曾一首

師曾字伯魯吳江人嘉靖癸丑進士選庶吉士

授兵科給事中歷刑科左給事有湖上集

詩話伯魯說經鏗鏘又輯文體明辨以廸後學
一官清要五疏乞歸其述志賦云相先民之不
朽兮託三事而流傳吾何有一於茲兮死速朽
而猶憊惜青春之不我與兮忽已至乎衰年胡
不及時以精進兮擇可修而勉旃昔賢有言耄
未至惛衰不及頓尚可厲志於所期又言進不
及達退無所矯伯魯之謂矣
詩亦清婉蓋斤斤學唐者

宿磚河驛

渡頭風色晴漁火隔沙明帆逐暮雲落潮隨春水平長

蘆昨夜月甲馬舊時營關隘今無事稀聞擊柝聲

顧曾唯一首

曾唯字一貫吳江人嘉靖癸丑進士除金華知縣擢浙江道御史巡按廣西引疾歸有閩越雜咏

同賓峰集我渡山房

旅客貪呼伴芳尊共解顏清池來浴鳥高閣俯重山墮酒松花細抽梢竹筍斑

一作當軒
蘿月間

夷猶二三子竟日不

知還

姜子羔 二首

子羔字宗孝餘姚人嘉靖癸丑進士除成都府

推官入為禮部主事終行太僕卿

黃太冲云太僕幼侍王文

成講席不與詩人爭一聯半句之工然俊爽之氣湧出行墨之間不可掩也

登峨嵋絕頂吟

君不見大峨之山矗西土乃在軒轅之臺列仙之府我
騎飛龍叩天戶九州歷歷皆可數初由平陸瞻青冥丹

梯翠磴愁攀登亦鳥伸而猿引斯颺舉而雲升下視大
壑不知其幾萬仞惟見長蛇尺蠖挂絕壁之蒼藤攀危
厯險趣未畢積雪陰風轉蕭瑟初疑雲自石中生寧知
日向雲間出普賢巖前雲日晴圓光倒照何熒熒晻然
五色相照耀有若虹蜺跨海掩赤城是非山澤氣無乃
陰陽精須臾雲散日西走光亦隨雲隱巖口對此喜極
心神舒聖燈又出南山隅初看一炬何趑趄少焉萬簇
皆東趨神竒鬼怪事殊絕銀燈火樹焉足娛歸來作歌

但坐嘯還問山靈有意無

下巖寺

一入招提境登臨思已牽地將金作界山以玉為泉僧
定魚皆出江空月自懸虛巖尊者像幻跡至今傳

鄭茂一首

茂字士元莆田人嘉靖癸丑進士除海鹽知縣
擢兵科給事中歷官河南按察使

過草萍驛

古驛荒煙斷征驂向晚停吟回江雨白坐對越峰青萬
事皆蕉鹿吾生亦草萍勞歌猶未已短缺復衝星

林命一首

命字子順建安人嘉靖癸丑進士歷官廣東按察使有陽溪集

遊定惠院和韻

言尋僧舍出東門紫菊黃橙處處村秋盡遠峰含翠靄
天寒斷岸落潮痕山中花謝臺空在亭上詩成酒續溫

不見美人湘水畔
數聲漁笛欲消魂

季

科 三首

科字與登江陰人嘉靖癸丑進士除行人選授
禮科給事中出為江西布政司叅政有雪浪間
居二橐了菴鷗盟錄

詩話與登歸田之後田產所入悉以築園園在
萬壽山麓中有六曲徑蒼雪嶺賜間堂雪浪湖
湖中有青螺墩妙高閣湖上有寄寄堂紅雲閣
華陽洞天又鑿洞為小桃源中有赤城樓來鶴
亭桃花泉曲水亭雲林桐江片石恒與朋
舊觴詠其間足稱好事詩亦安整不佻

太保顧惠巖公祇役泰山途次和答

紫極傳丹詔青霄訪玉華
霓旌翻日觀瑤島接星槎
寒蹋峯頭雪晴攀海上霞
翩跹雙白鶴遙駕五雲車

次韻答鄧薇山社長

祖席分襟地江關積雪天
寧知廬阜約翻上汶陽船
夢斷清秋半書來白雁前
心期渺流水虛奏伯牙絃

曲水亭

飛瀑雲中響清觴石上浮
蘭亭還我輩不減晉風流

侯 祁 一首

祁字應文鄆城人嘉靖癸丑進士歷官

知

府

浮圖峪

雄關北峙萬山中天外浮圖接太空
白馬遠從青海入紫臺高與碧雲通
秋風沙塞寒煙暝古戍旌旗晚照紅
自是聖朝無戰伐漢家不數貳師功

劉 侃 一首

侃字正言京山人嘉靖癸丑進士由戶部郎中
為知府有新陽館集

隴西雜興

西極秋高白鳥翻憑闌送目到河源久無槎影通銀漢
遙見天光下火敦青海風濤還積石玉門車馬半中原
崑崙故是征西路寄語山前吐谷渾

盛周一首

周字文郁秀水人嘉靖癸丑進士除知浦城縣

入為刑部主事歷郎中出知東昌府

詩話太守少從王龍溪遊與沈先生堉夫講學于聞湖書院遺址在梅家蕩水中其子姓至今聚族於斯聞其報最日忤分宜父子不得臺諫蓋莊士也

蔡見麓過夜坐

南浦停車暝色催故人相見且銜杯月明何處吹長笛
落盡空山幾樹梅

王可大 一首

可大字元簡吳江人嘉靖癸丑進士台州知府

有懸筒集

宮詞

承明殿裏諫章來封事君王次第開此日昇平邊圉靜
日斜猶自在平臺

史起蟄

一首

起蟄字德龍江都人嘉靖癸丑進士

江上

溪雲窈窕海天晴檻外江流似掌平午夢醒來無一事

水雲亭上看潮生

吳文華 一首

文華字子彬連江人嘉靖丙辰進士累官南京
兵部尚書贈太子少保謚襄惠有濟美堂集

謁岳武穆祠

幾樹蕭森岳廟東一杯懷古酹西風
凱歌竟負黃龍飲信誓虛傳鐵券功
無復翠華回絕漠最憐白雁入行宮
神州恢復千年恨讀罷遺詩恨未終

方九功 一首

九功字允治南陽人嘉靖丙辰進士歷官南京

工部右侍郎有息機堂

歐楨伯云允治詩嚴整夷暢

范介孺云允治音節清亮意趣
雋永獨超物外不習一綺麗語

泊滄州有感

世事看流水漂零見此身他鄉猶是客失路竟依人樹
引長堤暮花殘故國春卷簾聊對酒幽寂恐傷神

周詩 一首

詩字興叔錢塘人嘉靖丙辰進士歷官通政使
有與鹿集

赴天津

仲夏衆芳歇沃野羣卉稠曜景窮北陸薰風獻南陬伊
余赴期會東驚戒方舟晴雨遞昏晝涼燠變絺裘滌洄
見湖澳寂歷懷滄洲結髮事明主策勲慕前修名賤業
匪建時往命不猶才將世途左道與隱者謀漆園侈達
生柱下崇致柔優哉聊卒歲庶以謝愆尤

胡直

二首

直字正甫泰和人嘉靖丙辰進士除刑部主事
出為湖廣按察僉事歷四川布政司叅議乞休
起補湖廣提學副使陞廣西左叅政歸有衡廬

精舍藏橐

孫山甫云正甫胸次洞然有物我同
體之懷故其詩暢而鬱直而婉天趣

獨深非追
琢可及

登衡嶽

弱齡慕遐舉中為世網嬰雖抱及物志而非濟時英家

本衡廬交早負泉石盟
東憲涉湘沅吏事滋牽縈
靈岳奠疆域渺若隔蓬瀛
恭承帝新命駕言自西征
迴車恣探歷使我夙心傾
朝暎蕩雲巘導我游上清
吾衰疲塵鞅學道未有成
安得同心友眷言事耦耕

龍洲

窈窕繁花路清虛野甸居
漸為逃世客嬾蒼貴人書
水閣依鷗鳥塵編信蠹魚
日尋垂釣侶長到月明初

張潛一首

潛字用昭華州人嘉靖丙辰進士除戶部主事
轉員外改禮部歷郎中出為廣平知府陞山東
左叅政有東谷集

送邃菴相公巡邊

羽書昨夜入甘泉朔漠流沙起塞煙
遂使至尊親授鉞
遙煩上將出巡邊望隆數入論思地
寄重三持節制權
諸鎮安危憂不細宵衣應待凱歌旋

黎民衷一首

民衷字惟和從化人嘉靖丙辰進士歷官吏部
郎中出為廣西叅政

月夜吳舍人過集

向夕羣愁起幽期幸不迷
天垂鵲鵲外城轉鳳皇西
翠
彈淹宮漏春星散馬蹄
十洲飛夢遠何路問丹梯

姚汝循 六首

汝循字敘卿上元人嘉靖丙辰進士除杞縣知
縣遷南京刑部郎中出知大名府謫嘉州知州

有錦石齋集

詩話敘卿詩格不高然五古遠做陶韋近體能
宗太厯此益蕩潢南道人入之李何諸公之列
目為盛明
十二家也

夏夜對月

落日暑暫歇微風蕩靈襟
塵淨庭宇竹樹森繁陰皎
月牆東來照見石上琴揮手一再鼓悠然生遠心
鍾期久不作千載誰知音

秭歸立秋

晷運相推斥昨夏今已秋玄蟬鳴不歇大火莽西流人
生寄一世漂如波上漚乃為一尺組而來萬里遊琴書
委不理與言非故儔曉起戴星行入夜尚不休勞勞寡
懽悰戚戚增煩憂短景易以邁茲歲且復周功名建何
時霜華欲滿頭自不堅始願及此將誰尤

自橫梁放舟還郡

解纜橫梁渡鳴橈濯錦川秋山初過雨夕漲欲浮天四
野明殘照孤城合暮煙塊無仁者政竹馬亦橋邊

半峯禪院遲同遊諸君

策杖欵禪扃垂藤交古路却顧後來人蒼蒼隔煙霧

回雁峯

回雁峯頭望帝京寒雲黯黯不勝情賈生已道長沙遠
今過長沙又幾程

巫峽書所見

巫山萬仞鬱嵯峨巫峽嘈嘈湧白波多少行人齊下淚
漁郎猶唱竹枝歌

施篤臣 一首

篤臣字敦甫青陽人嘉靖丙辰進士官至順天

府尹

社日沽頭作

蕭蕭沽城東纍纍陌上墓掃除骨肉稀含淒當古路墓
上車馬喧墓中人不寤撼撼白楊枝怪鴟啼無數人生
若流水一去誰迴顧形骸草木姿詎比金石固往者何
足歎來者將焉措驅車此彷徨擬續招魂賦

卞

錫

一首

錫字叔孝嘉善人嘉靖丙辰進士除中書舍人

選吏部稽勲主事有豹山集

陳仲醇云分宜柄國言者以蚍蜉撼

樹不勝者止司勲往往抗其盛氣方袖封章彈之適聞親訃還里故其居恒所為詩聊蕭不平

感慨

早露

曉舟即事

野寺侵雲出千家草色勻晚風吹浪白夜雨濕苔新去

雁聲何急當樓鼓尚頻回看煙樹合殘月下城闌

鄭洛一首

洛字禹秀安肅人嘉靖丙辰進士除登州推官
遷廣東道御史累官少保兵部尚書兼右都御
史贈太保謚襄敏

冬夜獨坐

天涯歲暮夜淒淒鼓角初傳月已低一榻悠然成獨坐
不知身寄玉關西

曾同亨一首

同亨字于野吉水人嘉靖己未進士累官太子

太保南京吏部尚書謚恭端有泉湖山房集

贈趙大叅赴山西

雁門關外羽書飛帝念西征數解衣邊徼鼓鼙渾未歇
人家煙樹覺全稀無煩兵法儲行橐自請長纓出禁闥
十二屯田方畧在策勲看拜徹侯歸

魏時亮 一首

時亮字敬吾南昌人嘉靖己未進士以兵科左

給事使朝鮮累官南京刑部尚書

平壤拜箕子墓并訪井田遺跡

禹範留西土先生獨向東道無浮海歎義與采薇同舊
井存殷畫舁冠尚古風荒丘平壤外麥秀想遺宮

沈節甫 一首

節甫字以安烏程人嘉靖己未進士累官工部

左侍郎贈右都御史謚端靖有太樸集

題且佳軒

此邦非吾鄉此室非吾廬情知匪久客且復卜其居蕭
蕭環堵中俯仰欣有餘天地為逆旅百年亦須臾羲娥
無停轂吾生自有初念此坐長歎秋風起庭樗飄蓬任
回飈素位恒晏如

張

鹵一首

鹵字召和儀封人嘉靖己未進士歷官右副都
御史巡撫真定改大理寺卿調南京太常寺

卿

得張嶠嵒銅梁書

萬里蠶叢寄一書
開緘涕淚滿衣裾
可憐話別六年後
同事招魂九死餘
事過始諳渾失計
眼前莫更問何如
寒灰老我真心定
汴水河干已結廬

沈奎一首

奎字文叔江陰人
嘉靖己未進士除戶部主事
歷郎中出為浙江按察僉事
分巡嘉湖遷江西
布政司叅議有歸興集

富春

雨後衆山青
汀邊雙鳥白
挂帆趁西風
遙看富春驛

沈啓原

五首

啓原字道升秀水人嘉靖己未進士歷官陝西

按察副使有鷄園草

項里西楚霸王廟

符命通神契天心屈霸圖風雲空叱咤陵廟且榛蕪悔

失師中范徒憐帳下虞江東餘父老伏臘走村巫

同劉教授羅訓導再過福昌寺赴縣尉祝子餞
為踐東林約相要竹裏行升堂秦博士倚席魯諸生吏
道空馳傳賓筵再鼓笙不緣仙尉引誰共冶遊情

懷陸仲長

京洛追游處春風次第吹官從一命始別是隔年期藥
裏趣中禁方書得上池正逢欣賞日未許動鄉思

謁宋真宗廟

玉輦巡游處荒亭半綠苔攀號龍已去瞻禮客重來漢

時空遺蹟秦封亦有臺何如恭己日稽首咏康哉

冬日偕袁池南楊完愚陳夔石餞盧外山鄉丈於
靈應觀觴詠移日

飲餞離亭日半黃飛雲落葉對清觴江山去住皆陳迹
賓主東南是故鄉翠竹含風仙院靜白蘋牽浪楚天長
追攀未盡登臨興野水寒禽又夕陽

錢鎮四首

鎮字守中烏程人嘉靖己未進士官兵部郎中

有淡菴集

許孟中云淡菴詩冲逸似陶韋

詩話守中從唐子鎮講學居弟子之首而詩無塵腐之習中年卜宅思溪掘地得宋王觀察永從薰玉掩之而築堂其上不以爲忌也永從嘗刊五代史纂誤雜錄二書置本郡庠後取以補監本見陳氏書錄解題今思溪土人不復有知其姓名者矣錄守中詩附識於此

餘不前溪

苔水從南來真源自天目始出纔涓涓蛙跳雀可浴東風桃花水一夜高於屋百里下吳興一汛更一曲青山浮水面處處居可築草玄伊誰亭名花間疎竹自昔稱

餘不佳名豈虛辱

山中雜興

結廬傍青山繩樞甕為牖生涯陌上桑行逕門前柳獨
行媿偶偶顧盼無與偶策杖求友生陶潛去我久豈伊
逃醉鄉翻念魯中叟寂寞柴桑間豈意千載後廬山舊
遊路往跡今已朽古今諒同轍悵望一騷首

新晴散步

自啓郊扉曳履行傍溪雲日放初晴新篁拔地已數尺

黃鳥隔林時一聲老去任情忘檢束客來廢禮闕逢迎
家臨西塞清溪口坐看桃花錦浪生

田家雜興

細艸行來芳徑修篁覆處茅菴借問丈人生計薄田自
種溪南

張祥鳶

六首

祥鳶字道卿金壇人嘉靖己未進士除戶部主
事歷員外郎中出為河東運司同知遷知雲南

府有華陽洞橐虛菴集

詩話道卿詩瀟灑絕

俗類永嘉四靈

東平道中

驅車涉長道荒塗曠無人
斜陽澹古木驚風翼征輪
候館莽牢落日暮寒城闌
停驂一以憇振我衣上塵
庭樹集歸鴉依依得所欣
如何客遊子不念平生親

新秋帆舟過西莊聽雨話舊

放船秋水落能載兩三人
坐愛清波影輕搖白氎巾
到

門纔繫纜藉艸便垂綸野飯無兼味嘉魚色勝銀

京口月夜惜別

春江明月夜不是別離時酌以桃花酒贈之楊柳枝轉蓬身共遠倦鳥意俱遲明發天涯路青山惱夢思

園居

人境重重隔溪流宛宛分竹陰飛翠雨花氣結晴雲籬缺牽蘿補園蕪植杖芸禽言能細譯幽事賴先聞

上巳日寄鄭虛舟

三月三日春可憐百勞聲裏花如煙臨邛大夫有佳客
廣文先生無酒錢放歌誰和舞雩曲洗硯獨寫蘭亭篇
我欲從之問奇字出門無那春風顛

登北固山

孤峯縹緲赴江天白石紅塵樹杪縣一道澄波開斷壁
千林黃葉下寒煙鵬盤寥廓秋風急山缺西南落日圓
萬里中原勞北顧蕭梁陳迹酒杯前

申時行

七首

時行字汝默吳縣人嘉靖壬戌賜進士第一累
官少師兼太子太師吏部尚書中極殿大學士

贈太師謚文定有賜閒堂集

馮元成云申公有
韻之文對口立就

不為叫囂亢厲之音卑弱浮靡之調古體淵源
建安近體沉浸初唐不事摹襲而自無不合

詩話趙尚書批識于廷益於早歲顧尚書璘識
張叔大於童時傳者以為佳話先太傅公九齡

獲見文定文定特起避席時先公未就塾文定
留之邸第讀書一日從師出遊先公失足蹈汙

泥文定命僮子回取履童子誤持文定朝鞋至
先公不敢納文定笑曰履之終當踐我迹耳及

舉順天鄉試同學少年有恃才者曰朱兆隆亦
能成名邪文定拂然曰兆隆將大魁天下若輩

馬知明年先公果臚傳第一其藻鑑不爽若是
文定不以詩見長然鉅篇長律鋪揚典麗足令
操觚者縮手如云老去空悲千里
驥秋來真憶四腮魚風度可想也

題清秋出塞圖

生不識醫無間夢不到狼居胥
瞥然示我出塞圖令我目眩心神徂
憶昔籌邊贊廟謨桓桓司馬傑
大夫帝授節鉞臨玄菟高憑熊軾
佩虎符榆關九月沙州枯霜鷹
下擊秋原蕪煙荒雲慘天糝糊
惟茲遼左僻海隅頻年侵擾無寧
都射雕躍馬彎強弧司馬申令陳
師徒指揮

鐵如意玩弄金僕姑揚旌督戰親援枹萬卒超距爭先
驅奔狼突豕皆就俘凱歌入奏天顏愉司馬讓功歆若
無但云將士多勤劬何以勞行役請蠲幕府租何以恤
飢疲請發司農儲人人挾纊齊歡呼自從司馬歸江湖
遼人茹苦若堇荼荷戈不解甲輓粟仍飛芻羽徵徵材
官絡繹在道塗震隣之恐非剥膚騷動根本何為乎安
得再起司馬登戎樞坐紆長策銷隱虞國威震壘邊人
蘇

洞庭篇壽嚴中翰

崔嵬乎洞庭之山乃在勾吳之墟具區之藪芙蓉點點
七十二雙結青螺綰其口我昔凌滄洲振衣千仞巔西
登縹緲接銀漢東望莫釐生紫煙珠宮貝闕儼相向恍
似員嶠方壺天吾聞靈威丈人入林屋手探蒼水金庭
錄又聞毛公羽化留空壇時有鸞鶴來雲端茲山信美
多靈秘幽棲故是神仙地主人三殿倦揮毫出山便作
還山計只今六十早歸田攝生日誦叅同篇洞庭之水

釀春酒醉來恣拍洪崖肩

哭王子幻

慘澹江天裏何人問客星
空傳懷舊賦無復艸玄經
物外悲長往人間忌獨醒
牀頭孤劍在永夜泣青萍

送初主簿罷官歸楚

吳苑初傾蓋荆門早挂冠
宦憐潘岳拙曲和郢人難畏
路窮棲棘芳洲信采蘭
浮沉何足問江漢有漁竿

大閱詩應制

廟畧收羣策宸遊簡六師代當全盛日春是大蒐時雲
捧蒼龍駕風迴翠鳳旗棘門開複道帳殿繞行麾細柳
前軍駐長楊後騎隨虬鬚天策將猿臂羽林兒拂劍星
文動彎弓月影披連營分雁翼布陣合魚麗禮示三驅
正鋒藏九變奇張侯仍是豹賈勇盡如羆引滿雙鵬落
騰空萬馬馳元戎歸節制法從肅威儀詎數誇胡獵還
欣奏凱期大風歌漢士吉日誦周詩我祖黎庭烈先皇
保泰規永言思繼述持以贊雍熙

立春日賜百官春餅

紫宸朝罷聽傳餐玉餌瓊肴出大官
齊日未成三爵禮
早春先試五辛盤
迴風入仗旌旗煖
霽雪當筵七箸寒
調鼎十年空伴食
君恩一飯報猶難

辛卯元日

紫宸元會輟朝天
咫尺無由捧御筵
遲日曛曛虛正殿
非煙縹緲在甘泉
王師未奏康居捷
農扈誰占大有年
袞職自漸無寸補
惟應投老賦歸田

余有丁 一首

有丁字丙仲鄞縣人嘉靖壬戌賜進士第三除
編修歷司業洗馬右諭德左庶子出為南國子
祭酒召入為少詹事兼侍讀學士遷太常卿歷
禮部左右侍郎改吏部進禮部尚書入直文淵
閣改戶部尚書兼武英殿大學士終少傅兼太
子太傅建極殿大學士卒贈太保謚文敏有文
敏公集

詩話文敏送肖甫

一律絕類劉文房

送張嵒

客行新霽後曙色留城頭曉徑穿雲濕春塘帶雨流江
蘿牽客思山鳥動春愁何事新芳歇王孫不可留

寒

達

一首

達字子修重慶人嘉靖壬戌進士累官太子太
保兵部尚書

冬日登毘廬閣

塞雁南飛迥高樓北望寒暮雲千嶂暝積雪萬家殘四
海徵輸盡三巴道路難天涯對搖落那得旅愁寬

林

煙

三首

煙字貞耀閩縣人嘉靖壬戌進士歷官南京工
部尚書有覆瓿集

諸公餞送城南樓寄謝

冉冉歲云暮于役殊未休冠蓋集相送置酒城南樓微
雨霽朝景騁望消人憂蒼蒼遠山色浩浩清江流丹楓

羅曲岸白鳥戲中洲景物紛可悅
騷歌促行騶衙門昨
棲遲杖屨忝從遊奈何遠離別
一日如三秋索居感羈
旅久要幕前修適意豈非違
徇祿良足羞山靈勿相誚
早晚歸林丘

府江渡

朝發陽朔崖暮次昭潭渡行邁千餘里孤舟日東驚
川途阻且長耳目漸非故巉巖夾崇山杙柯羅茂樹四望
寡人煙三時昏瘴霧深林蹊徑絕怪石波濤怒虎穴幸

徒蹤狼烽猶置戍客子獨何為艱險常道路雖懷叱馭
心寧免垂堂懼白日易蹉跎玄髮忽改素人生苦拘束
多為浮名誤萬事良悠悠達生庶可慕

苦雨述懷

我行赴京華征途纔及半渡江越淮南原隰何渺漫
暑當茲時氣候變昏旦迅雷激中宵陰雲翳層漢山雨
驟淋漓川流俄浩沚陽鳥避何許水鳥羣相喚高浪沒
危橋飛湍瀉崩岸我馬淖不前我車剝已斷屈詰歷羊

腸回顧屢顛汗僕夫仰天號客子撫膺歎吁嗟行路難
傍徨日將晏塵中苦局促物外思蕭散挂冠亦繇人何
事長羈絆

戚元佐 一首

元佐字希仲秀水人嘉靖壬戌進士除禮部主
事歷員外郎中陞尚寶司少卿有青藜閣橐

詩話吾鄉彭子殷論詩即尚七子然其詩不類
也至戚希仲則全以七子為主象翁州列四十
子不及希
仲何與

早朝

鳳掖傳呼早晨趨
逼禁闌天香浮輦靜
宮漏隔花微仙
掌明河動周廬列宿
稀不知風露重先濕
侍臣衣

高則益

一首

則益字受所南昌人嘉靖壬戌進士官至四川

叅政

聖駕大閱歌

平明仙蹕下丹霄
千騎風雲擁射鵰
盡道吾皇能將將

軍中誰是霍嫖姚

蔡可賢 一首

可賢字子齊成安人嘉靖壬戌進士官至按察
副使有西征鼓吹

樓煩

山後山前十六州天涯盡處是偏頭雲開大漠風沙走
水折長河日夜流萬戶金縷愁見月千羣鐵騎畏逢秋
却思大漢無中策一曲胡笳倚戍樓

鄭履淳一首

公字伯寅海鹽人嘉靖壬戌進士除刑部主事
改尚寶司丞建言廷杖終光祿寺少卿有集

詩話昭陵繼世海宇寧清少卿時為尚寶丞初
無言責乃上痛哭之書至云物怪人妖天鳴地
震彗星兩見於尾女日月相蝕於元春鬼神告
凶災害落至始有陳涉與赤眉之徒窺伺於世
雖李綱宗澤之才展布猶難其亦過於激烈矣
當日予杖一百流血濡縷至今遺袴藏其故宅

春閨

朝來靈鵲遶簷鳴果得雲箋慰遠情但說別來長見憶

歸期依舊不分明

沈玄華 一首

玄華字邃伯一字少河嘉興人嘉靖壬戌進士
除禮部主事歷官南京太常寺卿轉大理寺卿

詩話明南都太廟嘉靖中為雷火所焚尚書湛
若水請重建而夏言阿世宗意請龍有青并入
奉先殿按長陵每自稱曰朕高皇后第四子也
然奉先廟制高后南向諸妃盡東列西序惟碩
妃一人具戴南京太常寺志蓋高后從未懷妊
豈惟長陵即懿文太子亦非后生也世疑此事
不實誦沈大理詩斯明徵矣大理性恬退不樂
廳仕歸遂潔白之養歿後玄孫傳乃撰拾遺集

早失傳是詩獲
於高工部寓公家

敬禮南都奉先殿紀事十四韻

高皇肇太廟松栢連穹霓尊祖有孝孫典禮適升躋一
從遷都後遺制終未睽有司列俎豆上公視瓚圭豈意
歲甲午烈火墮椽題謄謄出出音其兆先端俛盈廷議
移祀中廢成町畦猶餘奉先殿薦新及菹醢微臣承祀
事入廟歌鳧驚高后配在天御幄神所棲衆妃位東序
一妃獨在西成祖重所生嬪德莫敢齊一見異千聞實

錄安可稽作詩述典故不以後人迷

徐廷綬 一首

廷綬字受之淳安人嘉靖壬戌進士除刑部主
事歷員外郎中出知辰州府遷陝西按察副使
有錦泉集

胡松麓自瑞州以書見寄

搔首西風裏懷君思惘然江湖千里隔雲樹寸心懸客
淚隨猿落鄉書有雁傳惟應今夜月相對共遙天

穆文熙二首

文熙字敬甫東明人嘉靖壬戌進士除行人進
司副遷工部員外改尚寶司丞轉吏部員外出
為廣東按察副使有逍遙園集

石拱辰云敬甫
早年詩頗豪宕

摩鍊既久
遂臻大雅

詩話敬甫論詩沾沾自喜亦強作解事
爾集為劉子盛石拱辰所定又安得佳

聞拱辰符卿至自京志喜

漳水燕山道路賒相思常苦暮雲遮到來不必論時日

三見庭前木槿花

題乾山卷

幾年為客滯江關
夜夜汾陽有夢還
卷裏畫圖君莫看
斷人腸處是家山

楊汝允

一首

汝允字惟明南昌人
嘉靖壬戌進士
歷官姚安知府
有九霞山人集

同日冊封六妃

官花笑日草生春喜動天顏沐寵新同侍翠華遊幸地
不知辭輩是何人

錢貢一首

貢字時庸桐鄉人嘉靖壬戌進士除知新建縣
入歷刑部郎中有愛存橐

京邸懷歸適妻弟唐楮汀來謁於其還賦長句言
別

此日意不樂掩關有所思忽聞君遠來錯愕令我疑平

生不辭鄉安得來京師去年與君別屈指已一暮南望
懷故人日與浮雲馳嗟予坐羈束素顏日以緇金門盛
才賢迂疎將何為感之百憂集歎息還自嗤君今馬首
南握手復何辭投簪雖未能煩君語吾兒貧賤雖爾輒
富貴匪我期願言各努力勉將門戶支予家柞溪東綠
水環茅茨豈獨饒桑麻松竹植亦宜好闢十畝園樹藝
須及時護筍編枳棘灌花引泉池待予此中老與君同
栖遲此願良未果永懷常在茲去去勿復陳人生多別

離夜闌欹枕卧暑雨捎果愚

詩話錢公居甌山之陰沒葬山麓其後人至今聚族柞溪左右桑麻松竹蔥蒨依然長篇不事

雄繪有白

太傅遺音

楊成名

一首

成名字志完建安人嘉靖壬戌進士武進知縣

有遂初集

秋日郊行

路遠溪流細山迴樹色分客沽村店酒牛卧隴頭雲林

葉含秋露溪煙澹夕曛兒童迎我笑拍手自成羣

許

國

二首

國字維楨歛縣人嘉靖乙丑進士改庶吉士除
檢討歷編修右贊善洗馬遷南國子祭酒轉太
常卿協理詹事陞禮部侍郎進尚書入直東閣
加太子太保累晉少傅吏部尚書建極殿大學
士卒贈太保謚文穆有許文穆公集

擬御製勸農詩

四民皆天職嗟農獨苦辛所以古哲王巡省及茲辰簫
鼓吹豳詩訓迪良謨謨東郊土脉動好鳥鳴芳春桑間
拂其羽催耕一何頻乘時播嘉種原隰何匀匀念茲民
所天珠玉安足珍一日苟不作飢寒將立臻勿惜沾體
勞但憂年歲屯沾體勞尚可歲屯傷我民憶昔先皇時
端居軫郊閭載賡憫農咏丕揚烈祖仁禁苑籍千畝雨
暘雩百神玉食豈不足貴令四海均九重高結念况爾
謀其身古人有良言歲計在於寅豈伊公家賦婦子亦

相親春風正發育萬物皆鮮新勉以東作力佇見西成
裡

秋聲

銀漢滄浪淨碧空天街一葉下梧桐霜前淒切兼砧杵
月裏悲涼斷塞鴻何處羈人驚伏枕幾回中夜感飄蓬
絲來志士輕搖落莫向西風憶桂叢

何洛文

一首

洛文字啓圖信陽州人嘉靖乙丑進士選庶吉

士歷官禮部左侍郎兼翰林院學士有震川集

壽諸震川大復之孫仕雖通

顯詩頗庸熟去祖武尚遠

章皇帝御筆白馬

臺上黃金駿毫端白雪驄
玉花生御榻寶繪奪天工
照夜雙珂瑩凝霜匹練空
瑤池仙馭遠猶見畫圖雄

周子義 一首

子義字以方無錫人嘉靖乙丑進士改庶吉士
歷官吏部左侍郎兼侍讀學士贈禮部尚書謚

文恪有交翠軒佚橐

送何小坡致政還信陽

海鶴遠置網冥鴻謝鞬籠人間千丈絲安能繫游龍所
以達命士脫迹塵囂中眇茲盈尺組曾是羈我躬何侯
東海彥司牧早奮庸一麾指淮右載旆佐漢東斯民有
父母國論方爾崇朝宗甫竣事高蹈隨赤松薄言戒行
李云歸天目峯惜此遠行別不得少從容載歌驪駒詞
聊以紓我衷

林如楚 二首

如楚字道翹侯官人嘉靖乙丑進士歷官工部

右侍郎有碧麓集

初秋齋居作

招搖指坤隅六龍忽迴軫清商應候至碧梧乘夕墮離
居及素節徙倚步華楯睠彼元運馳往復良有準人生
何勞勞年命如朝菌曩觀隨化徂新緒緣物引無以騷
人悲將貽榮公哂吾其解天弢去來守玄北

會江驛

停舟異昔年城郭尚依然樹影浮天外江流會驛前暮
帆懸海月晴磬出山煙稍喜春來近居人話種田

陳文燭

三首

文燭字玉叔沔陽人嘉靖乙丑進士除大理評
事歷寺副寺正出知淮安府遷四川提學副使
歷漕儲叅政福建按察使右布政使江西左右
政使陞應天府尹終南京大理寺卿有二酉園

五岳山房集

胡元瑞云玉叔詩清
婉典飭居然名家

送楊惟喬侍御北上

驛路飛新雨荒亭落晚風
賜環霄漢上擊楫大江中
此地曾留犢都人尚避驄
春華今又丰樽酒幾時同

送陳仁甫太史使楚

玉署承天遣桐圭錫帝封
浮湘即司馬作賦是元龍
春盡寒江雨潮迴故國鍾
禹碑如可辨還上祝融峯

送別

落日青絲騎西風白苧詞廣寧門外柳折盡向南枝

管大勲 一首

大勲字世臣鄞縣人嘉靖乙丑進士改庶吉士
官至南京光祿寺卿有休休齋集

安慶渡李陽

客路荆舒盡江帆海國賒天風蔽晴日煙雨漲平沙水
濶疑無岸春深不見花暮潮南浦泊指點驛樓斜

胡孝 二首

孝字原荆無錫人嘉靖乙丑進士除永豐知縣
再知安福入為廣西道御史以建言落職為民
有采真堂集

詩話侍御以建言削籍任使結客所識窮乏多
受其恩歿後王承父為其狀屠緯真為銘墓王
元美為作傳成盛稱
之詩亦間有合作

過雅宜別業

不見王摩詰猶餘華子岡隔河山杳靄斷樹水微茫有
子開松徑留歡正夕陽漁舟投暝合杯外即滄浪

梅

隴上春風生江梅幾枝發仙人坐吹簫飛墮一樓月

潘志伊 一首

志伊字嘉徵吳江人嘉靖乙丑進士除定州知
州陞南京兵部員外歷郎中出知九江府謫知
陳州移紹興府同知轉南康知府以江西按察
副使備兵素州以行太僕寺卿轄甘肅遷廣西
叅政

詩話潘公從遊吾鄉沈石雲先生之門講學之餘詩不多作所題存石草堂一篇即石雲之書

屋也

題存石草堂

名園迴塵域參差開石林丹梯襲曉光碧嶂含夕陰昔
自鬱林來置此間幽襟緬彼巨靈跡宛在梧江潯夫子
肯堂構誅茅面雲岑棲巖意已遠陟岵思逾深樞衣緣
磴道拭目見巖峯茲言懷仰止誰謂愜登臨

沈淵

一首

淵字子源濟南新城人嘉靖乙丑進士改庶吉士授檢討進編修陞國子司業有中秘橐

塞上聞笛

何處吹羌笛秋風度玉關幾年愁作客此日更摧顏慘
淡邊雲合淒涼朔雁還梅花知盡落一夜滿天山

許 憫 一首

憫字文夫靈寶人嘉靖乙丑進士除三原知縣
徵授戶部主事歷員外郎中出知漢中府調南

寧陞陝西行太僕少卿有後崖集

西坪路

蒼蒼古木中夕陽忽已晚隔浦聞雞鳴人家知不遠

王圻 二首

圻字元翰上海人嘉靖乙丑進士除清江知縣
調萬安擢雲南道御史出為福建按察僉事謫
邛州判官兩知進賢曹縣遷開州知州歷官湖
廣提學僉事陞陝西布政使叅議有洪洲類稿

吳明卿云洪洲詩不落筌蹄不涉蹊徑惟意所適一無蹈襲鄭美命云遠之北地信陽近之海門所稱七子此亦一是非彼亦一是非諸君子為的而後進之士射聲焉未有能中者也先生詩點其佻巧而本之自然謝其夸毗而歸之賁際去其叫噪而由乎冲虛蓋矯志而獨行者也陸伯生云先生詩近大歷貞元之際晚年冲遠入陶韋門奧詩話洪洲拜分陝之命即詣告終養既歸松江之濱種梅萬樹曰梅花源仰屋梁著書門閭皆安席硯所撰續文獻通考謚法通考兩浙鹽志海防志三吳水利考裨史彙編雖舛漏尚多體例未當要亦留心有用之學者

觀忠惠祠有感

傑哉龍陽尉忠義今所希民瘼一憤激抗疏干天威手
持登聞鼓口叫閭閻扉但念流亡苦豈惜軀命微堆經
悟明主捐生視如歸歲額減過半始願終不違皇恩與
士節千古同光輝春秋薦蘋藻英爽此永依遺跡炳簡
策身沉名自飛願爾賢達裔奕世延清暉

商邱早行遇雪

雲暗商邱野天連葛伯城懷人宵不寐奔命雪仍行粉
絮因風舞瑤華帶雨傾貂裘寒欲透客淚洒塵纓

歸有光

六首

有光字熙甫崑山人嘉靖乙丑進士除長興知
縣量移順德通判遷南京太僕寺丞有震川先
生集

詩話弇州早年評震川文謂如秋潦在地有時
汪洋不則一瀉而已晚歲乃作贊云千載有公
離韓歐陽子豈異趨久而自傷蓋悔
之深矣詩非漁擅然猶勝七子成派

遊靈谷寺

晨出東郭門初日照我顏春風吹習習好鳥鳴喧喧巖

阿見黃屋登坡尋神仙半日猶山麓十里長松間蜿蜒
芳草路寂寞古禪闕畫廊落丹雘朱戶蝕銅環殿起無
梁迥塢留玩珠攀蒼鼠戲樹捷野鹿看人閒山深靜者
愛日宴未知還

和俞質甫夏雨三十韻

浮雲方緩颺光景遂已戢浹旬深霖澍千里破封蟄茫
茫河伯歎蕭蕭山鬼泣靈曜邃高居朱明閤赫翕希微
澹將開浙瀝吹又急過夜轉連綿釀流更淪漶萬壑嚙

霰鳴百川灌注入池容添紋縠林色浸淤泥離畢月暫
耿宿井星恒濕漱灑湖光翻威咽海潮澀霓旌尚高翔
雲衣猶日緝水覆詎可收天漏誰能葺馬牛三江混鴻
濛九峰立嗟我來自東獨行阻虛邑夢裏思明兩筮坎
成存習誰假卜商蓋但戴杜甫笠繽紛餘花落寂寞愁
烏集窮巷長閉門高河近通汲天地政氤氲雷風遽呼
吸悽悽聽晨鳥濛濛睇宵熠作人徵時賜思文憂民粒
龜黿費灰洒魚蝦饒投拾廣室坐增悽匡牀聽生悒何

由度日闕安能使家給泥塗踏重繭梅潤侵什襲寒袍
故戀綈瀾簡庸啓笈顧歎風雲滿寧使蛟龍蟄短屐徒
齒齒折巾空岌岌俯仰觀宇宙塊圯迷原隰阻饑知不
免寅亮豈所及

寶應縣阻風

夜泊淮陰城蚤向淮南路理棹逢西風猖恣號怒清
河千里中東風日相悞祈此一日風終竟不可遇蒼天
豈有心莫可詰其故但看北去舟凌風如飛渡翻為去

人快頓忘吾所務
淼淼湖波深今日何可渡

邢州敘述

為令既不卒稍遷佐邢州雖稱三輔近不異湘水投過
家葺先廬決意返田疇所以泣岐路進止不自由亦復
戀微祿俶裝戒行舟行行到齊魯園花開石榴捨舟遵
廣陸黎棗列道周始見栽首箱入郡問驛驢維當撫彫
瘵天馬不可求閭閻省徵召上下無怨尤汝南多名士
太守稱賢侯戴星理民政宣風達皇猷郡務日稀簡吾

得藉餘休閒門少將迎古書得校讐自能容吏隱退食
每優游但負平生志莫分聖世憂矜待河水泮稅駕歸
林丘

甲寅十月紀事

經過兵燹後焦土遍江邨滿道豺狼跡誰家雞犬存寒
風吹白日鬼火亂黃昏何事征科吏猶然復到門

初發白河

邊風刮地起黃沙三月長安不見花却憶故鄉風景好

櫻桃初熟正還家

袁尊尼

三首

尊尼字魯望長洲人嘉靖乙丑進士官至山東
提學副使有集

長安感遇

朱華謝南土遊子客冀方豈不念遙歸簡書勞未遑
悠若懸旌條忽意靡常魏牟阻江海蘓子怨何梁失路
良可悲曠望迷周行春陽念將歇滯淫非我鄉願假鸞

斯翼超飛歷故疆

長興徐太守自汝寧歸王元美諸君同集胥江分
韻贈之得闕字

自薄淮陽守終然返故山江湖一麾罷歲月二毛斑中
論何當就浮名祇是閒因君夢茗水早晚叩雲關

送長兄再入留都

雲陽郭外草萋萋作陣楊花路欲迷幾樹黃鶯啼不歇
行人回首晉陵西

李 棡 一首

棡字孟敬豐城人嘉靖乙丑進士官至浙江按察副使

送友人還楚

南浦仙舟發颺風江上清故人從此去悵望若為情落
日浮彭蠡歸雲滿洞庭思心逐流水西下武昌城

施 愛 一首

愛字欲周福州左衛人嘉靖乙丑進士歸安知

縣有息菴集

寄李五

噫嘻復噫嘻與君恒別離
祇隔一溪水相見良難期
芊芊池畔草灼灼園中葵
條然悲風來凋謝寔萋其
思君令人老玄鬢忽成絲
贈君青萍劍神物合有時

明詩綜卷四十九